

DIDZA' GUSÖL-LĒ'Ē PABLO YÖDZÖ ÉFESO

Pablo rugapë' Dios bönachi queë' Cristo nacuá' Éfeso

1 ¹ Neda', Pablo, naca' gubáz nasól-lē'ē Jesucristo tu' gú'uni quézinē' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo. ² Rinábida'-nē' Xúziru' Dios, enca' Xanru' Jesucristo uzá' ládxë'ë queéli', en gunē' ga soa dxi icja ládxi'do'oli'.

Le naca queë' Dios Bö' Lá'ayi rata' queéru'

³ iRal-la' cú'uru'-nē' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queéru' yúgu'të le naca dxi'a que yehua' yubá, le runē' Dios Bö' Lá'ayi ga rata' queéru'. ⁴ Zí'atëlö ca benē' Dios yödzölió ni, guró cazë' rë'u para guéquiru' quez queë' tsözxón len Cristo, en gácaru' bönachi lá'ayi queë', en gácaru' idú dxi'a lahuë' Lë'. ⁵ Dios bucözë' zí'atëlö si' lu në'ë rë'u ca zxí'ini cazë' tsözxón len Jesucristo, tu' guyaza ládxë'ë gaca caní, en tu' naca le gú'uni quézinē' gunē'. ⁶ iRal-la' cú'utica'siru'-nē' Dios yöl-la' ba ni'a que le buzá' ládxë'ë queéru', yugu' le bennasë' queéru' tu' nácaru' tuz len Zxí'inē', Nu na' nadxí'inē'! ⁷ iCristo böá'uë' rë'u cate' ni' gútië' uláz queéru' para gaca uniti lahuë' Dios rë'u ca naca dul-la' nabága'ru'! iZxóntërö naca le buzá' ládxë'ë Dios queéru', ⁸ lë na' rúnnadë'ë Lë' queéru'! iLu yöl-la' rácada' queë', en lu yöl-la' réajni'i queë' ⁹ benē' Dios le bucözë' queéru', ate' buluí'inē' rë'u lë na' bigachi', le buzóa cazë' zí'atëlö usudxinē' lu në'ë Cristo! ¹⁰ Lë na' buzóa cazë' Dios usudxinē' cate' izá'a dza, naca gunē' ga ilaca tuz, en ila'cuá' lu në'ë Cristo yúgu'të le dë, le nacuá' yehua' yubá, en le nacuá' yödzölió ni.

¹¹ Tu' nácaru' tuz len Cristo, Dios guró cazë' rë'u zí'atëlö para guequi queéru' le nequi queë' Xúziru' Dios, lë na' bucözë' queéru' ca naca le gú'uni quézinē' Dios, Nu run yúgu'të ca ré'ëni quézinē' Lë'. ¹² Caní benē' Dios para cú'uru'-nē' yöl-la' ba ca naca yöl-la' zxön queë', rë'u ni ruzxöni ládxi'ru'-nē' Cristo zí'atëlö ca ia'zíca'rö bönachi. ¹³ Lësca' caní guca queéli'. Cate' biyónili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queéli' le naca bë' nácali' queë', tu' guchízië' icja ládxi'do'oli' Dios Bö' Lá'ayi, Nu na' guzxí' lu në'ë Dios isól-lë'ë queéru'. ¹⁴ Tu' zóalenē' Dios Bö' Lá'ayi rë'u, naca löza guequi queéru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

Pablo rinábinë' Dios gunnë' queéru' yöl-la' réajni'i

¹⁵ Que lë ni na', cate' biyönda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na'a dza ¹⁶ biti' ca' rusana' rea'-në' Dios: "Xclenu'", ca naca queéli'. Røjneda' libí'ili' cate' rulidza'-në' Dios. ¹⁷ Rinábida'-në' Dios queë' Xanru' Jesucristo, Dios na' náquië' Xúziru' nayépisëtërë', rinábida'-në' isól-lë'ë Dios Bö' Lá'ayi queéli', Bö' na' runna yöl-la' réajni'i queéru', en ruluí'i rë'u ca naca cazë' Dios, para gaca idú ca núnbë'ëru'-në'. ¹⁸ Rinábida'-në' Dios uzéajni'inë' libí'ili' lu icja ládxi'do'oli' para gaca inózili' ca naca le runru' löza, lë na' bulidzë' libí'ili' para uzí'ili' xibé, en para inózili' ca naca yöl-la' tsahui' que yehua' yubá, le guequi quégaca nupa néquiquequi queë' Dios, ¹⁹ enca' para inózili' cate' zxön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca zxön ni naca la' lébisö na' bulu'e lahui Dios ²⁰ cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayépisëtërë' ni' yehua' yubá. ²¹ Rinná bé'enë' nupa ni' ta'nná bë', en nupa ni' dë lu né'eguequi, en nupa ni' nadéli'gaca yöl-la' huáca, en nupa ni' nácagaca xan. Cristo nayépisëtërë' ca yúgu'të nupa nadéli'gaca yöl-la' unná bë' yödzölió ni, en lu yödzölió si' za'. ²² Dios budödë' lu në'ë Cristo yúgu'të le dë para inná bé'enë' le, en buzóë' Lë' quégaca bönachi queë' para gáquië' Xanru' lu yúgu'të le nequi queéru'. ²³ Yugu' bönachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

Nuláru' tu' nadxí'inë' Dios rë'u

2 ¹ Dios chibennë' yöl-la' na'bán idú queéli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'. ² Dza ni' benli' lébisö ca tun bönachi biti' nácagaca tsahui' nacuá' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa biti' túngaca ca rnna xtídzë'ë Dios. ³ Lësca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queéru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zíca'rö bönachi. ^{4,5} Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxón len Cristo tu' buéchi' ládxë'ë rë'u, en bidxí'ide'enë' rë'u. Nuláli' tu' zoa le buzá' ládxë'ë Dios queéli'. ⁶ Dios busubanë' rë'u tsözxón len Cristo para gunë' ga có'öru' tsözxón len Lë' ga ni' rinná bë'ë yehua' yubá. ⁷ Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxë'ë queéru', tu' budödë' Jesucristo ni'a queéru', le naca bë' ca nadxí'ide'enë' rë'u. ⁸ Nuláli' tu' zoa le buzá' ládxë'ë Dios queéli' tu' réajlë'ëli' Cristo. Busölë' libí'ili', calëga tu' nacuá' le naca dxi'a benli'

libí'ili', pero tu' naca le runsë' Dios. ⁹ Cuntu nu gaca gun ba zxön cuini tu' nulá, tu' cabí nulá nu na' tu' nacuá' le naca dxi'a nun nu na'. ¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácacaga dxi'a, le bucözë' zí'atëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

¹¹ Guli'tsöjné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bë' dá'gaquië' Dios, en nazí' lágaquië' bönni' narugu lu xipéla'gaquië', ta'nnë' nácali' libí'ili' bönni' biti' narugu lu xipéla'gaquië'. ¹² Dza ni' nubíga'li' ga zoë' Cristo. Gúcali' bönni' zi'tu' lógaca bönachi Israel, en biti' buzí'ili' xibé didza' benë' tsutsu Dios, en guzxí' lu në'ë bi gata' quégaca bönachi queë'. Guzóali' yödzölió ni, biti' zoa le runli' löza, en biti' núnbë'ënili'-në' Dios. ¹³ iNa'a, nácali' tuz len Jesucristo! iZí'atëlö nubíga'li' libí'ili' zi'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'. ¹⁴ Lë cazë' Cristo runë' ga rö'ö dxi icja ládxi'do'oru' lahuë' Dios. Lë benë' ga yugu' bönni' judío, en yugu' bönni' zi'tu' bulu'huöáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxön. ¹⁵ Lë ni benë' Cristo cate' gútië' uláz queëru', en gudúë' yugu' xibá, en yugu' le rinná bë' nazúajgaca lu xibá quégaca bönachi judío, ate' chopa cö' bönachi na', bunë' tuz bönachi cubi, nupa nácacaga tuz len Lë cazë'. Caní benë', en gulequi dxíë' yöl-la' rilé na'. ¹⁶ Cate' gútië' Cristo lë'e yaga cruz, busúluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

¹⁷ Caní guca, bulu'li lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zi'tu' ga zoë' Dios, enca' bönachi judío nacuá' gála'sö. ¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. ¹⁹ Que lë ni na', libí'ili', bönachi izá'a, bíti'rö nácali' ca bönachi zi'tu' zóali' tu luyú biti' nequi queëli', pero nabábalenli' bönachi queë' Dios. iChinácali' ca bi'i queë cazë' Dios! ²⁰ Libí'ili' nácali' ca tu yu'u zoa tsaz. Nácali' ca yugu' guió'j zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guió'j lo que xilibi zö'ö na'. ²¹ Idútë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacuá' tu'lapa yugu' guió'j que, para gaca tu yudo' lá'ayi le naca tuz len Xanru'. ²² Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

Náquië' Pablo huen libán que didza' dxi'a lógaca bönachi izá'a

3 ¹ Que læ ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibé', libí'ili', bönachi izá'a. ² Réquida' chinóz quézili' ca benë' Dios, budödë' lu na'a dxin runa' para uzí'ili' xibé le ruzá' ládxë'ë queëru'. ³ Dios bulu'e lahui le bigachi' queë', en buzéajni'inë' neda' ca naca. Ca naca læ ni chibuzúaja' láti'do' queéli' lu guichi. ⁴ Cate' ulábali' læ ni, gúnbë'ëli' le réajni'ida' ca naca le bigachi' ca naca queë' Cristo. ⁵ Dza ni'te cuntú nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶ Caní rna læ na' bigachi': "Ni'a que didza' dxi'a ila'deli' bönachi izá'a tsözxón len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibé tsözxón len légaquië' le guzxí' lu në'ë Dios unödzjë' quégaquië' tu' dá'gaquië' Jesucristo." ⁷ Dios buzá' ládxë'ë quia' le bennë' quia'. Lu yöl-la' huáca zxón queë' benë' neda' huen libán que didza' dxi'a queë'. ⁸ Nacra' cá'asö ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. ⁹ Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, læ na' naca tu le bigachi' queë' Dios, Nu ben yúgu'të le rilë'ëru'. ¹⁰ Caní guca, para iléquibe'e yúgu'të nupa ta'nná bë', en nupa dë lu në'ëguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácagaca bönachi queë' Cristo. ¹¹ Dios benë' læ ni, busudxinë' læ na' buzóa cazë' dza ni'te, le benë' lu në'ë Xanru' Jesucristo. ¹² Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. ¹³ Que læ ni na' ráta'yua' loli' bití' gaca chopa ládxí'li' tu' nözi le riguí'i rizáca'a neda' para gácalena' libí'ili', le naca tu le uzí'ili' xibé.

Ca naca yöl-la' nadxí'i queë' Cristo

¹⁴ ¡Que læ ni na', ruzechu zxiba' lahuë' Xuzë' Xanru' Jesucristo! ¹⁵ Ca læ', nazí'i ca' lágaca yúgu'të bönachi queë', nupa nacuá' yehua' yubá, en nupa nacuá' yödzölió ni. ¹⁶ Rinábida'-në' Xúziru' Dios, lu yöl-la' zxón queë', le nazáca'da', gunnë' queéli' yöl-la' huáca queë' Dios Bö' Lá'ayi, en gunë' ga gálali' lu icja ládxí'do'oli'. ¹⁷ Rinábida'-në' Cristo soë' icja ládxí'do'oli' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxí'i queë', en bití' tséaj bö' icja ládxí'do'oli' ca nadxí'ili'-në', ¹⁸ para gaca tséajni'ili' tsözxón len yúgu'të bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxí'ilö, en xitsá'alö. ¹⁹ Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

²⁰ iNa'a, yöl-la' ba Dios, Nu gaca gúntërö ca gaca inábaru' o ca gaca sa' ládxi'ru', ugunë' dxin yöl-la' huáca queë' lu icja ládxi'do'oru'!

²¹ iGácatíca'sö queë' Dios yöl-la' ba lógaca bönachi queë' Cristo, en lahuë' Lë cazë' Jesucristo, na'a dza, en yúgu'të dza zá'gaca! iCa' gaca!

Dios Bö' Lá'ayi nunë' rë'u tuz

4 ¹ Na'a, neda' ráta'yua' loli', yu'a lidxi guíë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. ² Guli'gaca nöxaj ladxi', en dxi'i ladxi'. Guli'cóz zxön ladxi'. Guli'güí' ladxi' luzá'ali' tuli' ia'tuli' lu yöl-la' nadxí'i queé'li'. ³ Guli'güí' ladxi' gácatíca'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhui'do' queé'li' le rutsaga libí'ili'.

⁴ Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yöl-la' huáca queë' Dios tsca naca le bennë' Cristo que queëru'. ⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guché'ë zían bönachi gula'dzúngaca.

Gudísië' quégaca bönachi le runódzjasë' quégaquië'.

⁹ ¿Bizxi ré'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödzülió cadxí'ilö ni. ¹⁰ Nu na' bötaj naca Bönni' na' buëpë' xitsá'tërö ni' yehua' yubá para budzë'ë yúgu'të len le naca cazë' Lë'.

¹¹ Cristo caz bennë' que queëru' yugu' yöl-la' huáca queë':

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusól-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sédinë' bönachi queë'.

¹² Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácagaca ca idútë le naca cazë' Lë'. ¹³ Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë cazë' Cristo. ¹⁴ Bítirö gácaru' ca yugu' bí'ido', ca nácagaca nupa na' tu'tsa'të ca túngaca, en nácagaca ca tu le naché' lu yegu, o ca tu le röjché' bítitës bö' recja, tu' ta'zí' lu né'eguequi bítitës didza' nu rusëdi

léguequi, nu na' rizí' ye'e léguequi len yöl-la' sina' que, en run ga ta'chixi ta'nigui. ¹⁵ Na'a, rë'u ni, tu' nadxí'iru' luzá'aru', ral-la' güí'iru' didza' le naca idútë li para gaca huöácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u.

¹⁶ Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxón ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizxón, en raca idú, ca na' zeaj rácarö idú ca nadxí'iru' luzá'aru'.

Yöl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigua le lu ná'ali', rnnía': Bítirö gunli' ca tun nupa biti' núnbë'gaquië' Dios, nupa na' tun ca ta'za'sö ládxi'guequi, ¹⁸ en nachul-la nanítigaca icja ládxi'do'guequi. Tu' cabí nözguequinë' le nácatë, en nazídigaquië', biti' nazí'gaquië' yöl-la' na'bán na' runnë' Dios queëru'. ¹⁹ Biti' ca' tu'tuí'inë'. Nudödi cúngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'.

²⁰ Nupa ni' bulu'sedi libí'ili' ca naca queë' Cristo, biti' ca' bulu'sedi libí'ili' gunli' ca tun bönachi caní. ²¹ Le naca idútë li biyónili' ca naca queë' Cristo, en le nácali' queë' tu'sédinë' libí'ili' le naca idútë li na' zóalen Jesús. ²² Guli'nná be'e yöl-la' bönáchisö queéli' le gúcali' zí'alö, lë na' riniti ni'a que yöl-la' rizé ladxi' queéli' le ruá' dö' le guzxi' ye'e libí'ili'. ²³ Ral-la' huöácali' cubi lu icja ládxi'do'oli', en lu bö' naca cázali'. ²⁴ Ral-la' sí'ili' yöl-la' bönachi cubi le nunë' Dios ca naca cazë' Lë', le ruluí'i cuini ni'a que le naca dxi'a, en le naca tsahui' runli', en run ga gaca gunli' caní.

²⁵ Que lë ni na', bítirö si' yé'ëli'. Yúgu'tëru' ral-la' güí'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

²⁶ Channö hualéli', biti' ral-la' gunli' dul-la'. Biti' ileli' xidzé. ²⁷ Biti' bi gunli' le güí'i lataj tu' xihui' ucúl-la libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzejë' quégaca nupa ta'yadzaj.

²⁹ Biti' güí'ili' didza' xihui', pero guli'güí' didza' dxi'a, yugu' le ilácalen nu yöni, en ilún ga gaca dxi'a que nu na'. ³⁰ Biti' usuhuí'inili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölé' libí'ili' lu dul-la'.

³¹ Guli'cúa ladaj libí'ili'

yöl-la' ruzxë'e, en yöl-la' ridzá'a,
en yöl-la' rilé, en yöl-la' ridil-la didza',
en yöl-la' rutsaga yudxi,
en yúgu'të yöl-la' biti' rilé'e luzá'ali' dxi'a.

³² Ral-la' gácali' dxi'i ladxi',
en huéchi' ládxi'li' luzá'ali' tuli' ia'tuli',

en uniti loli' luzá'ali' tuli' ia'tuli',
ca na' benë' Dios, buniti lahuë' libí'ili' tu' nácali' tuz len Cristo.

Ca ral-la' ilaca nupa nácacaca ca bi'i queë cazë' Dios

5 ¹ Tu' nácali' ca bi'i queë cazë' Dios, ate' nadxí'inë' libí'ili',
guli'güí' ladxi' gácali' ca náquië' Lë'. ² Ca naca yúgu'të le runli':
Ral-la' idxí'ili' luzá'ali' ca na' benë' Cristo.

Bidxí'inë' rë'u, en budödi cuinë' lu yöl-la' guti uláz queëru'.
Ben cuinë' ca böa' bédxido' rútiru'-ba' lahuë' Dios tu' nözi dul-la'
nabága'ru'.

Gúquië' ca' ca tu le rilá' zxixi le raza ládxë'ë Dios le rigú'uru' lu
bucugu lá'ayi queë'.

³ Tu' nácali' queë' Dios,
biti' ca' gunli' le ruá' dö',
en biti' gunli' le cabí ral-la' gunli',
en biti' uhuídi'li'.

Ní'irö cuntu nu gaca bi innë queéli'.

⁴ Biti' güí'ili' didza' xihui',
o didza' canóz, o didza' cá'asö,
yugu' le cabí ral-la' gunli',
pero nácarö dxi'a guiéli'-në' Dios: "Xclenu'."

⁵ Chinóz quézili' nitüë' bönni' runë' le ruá' dö' biti' ca' tsázië' ga rinná
bë'ë Cristo tsözxón len Dios, o nu bönni' runë' le cabí ral-la' gunë', o nu
bönni' ruhuídi'në'. Nu na' ruhuidi' naca ca nu reaj ladxi' budó' guiój
budó' yaga. ⁶ Biti' güí'ili' lataj nu si' ye'e libí'ili' len didza' biti' nácatë.
Tu' nözi dul-la' caní Dios gunë' xíguia' nupa biti' túngaca ca rnna
xtídzë'ë. ⁷ Biti' ca' gunli' tuz bönachi caní.

⁸ Zí'atëlö guzóali' ga naca chul-la' que dul-la', pero na'a zóali' lu bení',
tu' nácali' tuz len Xanru'. Guli'gaca ca bönachi ta'dá lu bení', ⁹ tu' run
bení' na' ga gácaru' dxi'i ladxi', en ga güí'iru' didza' le naca idútë li, en
ga gácaru' tsahui'. ¹⁰ Guli'güí' ladxi' inózili' le raza ládxë'ë Xanru'.

¹¹ Biti' gútsa'li' nupa tun le ruá' dö', lë na' tunë' ga naca chul-la' que dul-
la', pero buli'béaj ga liná' yugu' lë na' tunë'. ¹² Utuí'iru' güí'iru' didza' ca
naca le tun bönachi na' bagáchi'sö. ¹³ Cate' bi ubéajru' ga liná', gaca bë'
yúgu'të tsca nácacaca, tu' gun le naca bení' ga gaca bë' yúgu'të. ¹⁴ Que
lë ni na' nazúaj lu guichi lë na' rnna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero
guli'gaca bönachi ta'yéajni'i. ¹⁶ Guli'sí' xibé lataj dë queéli' tu' chizóaru'
dza biti' raca dxi'a queëru'. ¹⁷ Biti' gácali' bönni' biti' bi nózguequinë'.
Guli'güí' ladxi' tséajni'ili' le ré'ënë' Xanru' gunli'.

¹⁸ Biti' súdxili', tu' gun yöl-la' rizudxi ga nítli' tsaz.
Guli'güí'ida' lataj inná bé'enë' Dios Bö' Lá'ayi libí'ili'.

¹⁹ Guli'güí'ilen luzá'ali' didza' tuli' ia'tuli',
ugunli' dxin yugu' le rul-la légaca salmo,
en yugu' le rul-la yöl-la' ba Dios,
en yugu' le rul-la nagu'ë Dios Bö' Lá'ayi icja ládxi'do'oru'.
Idú ládxi'ru' ral-la' gúl-laru' queë',
le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,
en guli'guética'së' Xúziru' Dios: "Xclenu'" ca naca yúgu'të.

Ca ral-la' gunru' quégaca di'a dza queëru'

²¹ Guli'gún ca rnna xtidza' luzá'ali' tuli' ia'tuli' para caní gunli'-në'
Dios zxön.

²² Libí'ili', yugu' nigula, guli'gún ca rnna xtídza'gaquië' bönni' que
queëli', ca na' ral-la' gunli' ca rnna xtídzë'ë Xanru'. ²³ Caní ral-la' gunli',
tu' rinná bé'enë' bönni' nigula queë' ca na' runë' Cristo, rinná bé'enë'
bönachi queë'. Cristo náquië' ca' Nu rusölá bönachi queë', nupa na'
dzágagaca le naca cazë' Lë'. ²⁴ Ca na' tun bönachi queë' Cristo ca rnna
xtídzë'ë, lësca' caní ral-la' ilunnu nigula ca rnna xtídza'gaquië' bönni'
que queégacanú ca naca yúgu'të le raca.

²⁵ Libí'ili', yugu' bönni', ral-la' idxí'ili'-nu nigula que queëli' ca na'
Cristo nadxí'inë' bönachi queë', en budödi cuinë', gútië' uláz
quégaquië'. ²⁶ Gútië' Cristo para bubéajë' quez queë' Dios bönachi queë'
na', ate' nayárigaca tu lu nisa le naca xtídzë'ë. ²⁷ Gútië' uláz quégaquië'
para gaca usudxinë' légaquië' lahuë' Dios, nácagaquië' ca tu lari' lachi,
biti' nuá' bösj le në'aj, en biti' naxú'una, en biti' zoa nitú le run ditaj le,
pero runë' ga ilácagaquië' idú dxi'a, cuntú nu gaca bi inné quégaquië'.
²⁸ Ral-la' idxí'ili'-nu nigula que queëli' ca na' nadxí'i cuinli'. Nu bönni'
nadxí'inë'-nu nigula queë', nadxí'i cuinë'. ²⁹ Cuntú nu bönni' runi zi'
cuinë', pero rugahuë', en run chi'i cuinë', ca runë' ca' Cristo, ca rúnlenë'
bönachi queë', ³⁰ nupa dzágagaca idútë le naca cazë'.

iRë'u ni dzágaru' le naca cazë' Lë'!

iNéquiniru' xipélë'ë, en dxita queë'!

³¹ Lësca' caní nazúaj lu guichi lá'ayi le rnna: "Que lë ni na' tu bönni'
ral-la' ucá'anë' xuz xiné'ë para tsöjsóalenë'-nu nigula queë', ate' irópatë'
ulu'huóáquië' tuz." ³² Lë na' nazúaj lu guichi ni ruluí'i lahui tu le naca
idútë li, ate' neda' réquida' ruí'i didza' ca' ca naca queë' Cristo, en
quégaca bönachi queë' na'. ³³ Lësca' ruí'i didza' ca naca queëli'.
Yúgu'tëli' libí'ili', bönni', ral-la' idxí'ili'-nu nigula que queëli' ca na'
nadxí'i cuinli', ate' yugu' nigula ral-la' ilunnu bal bönni' que
queégacanú.

6 ¹ Libí'ili', yugu' bí'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. ² Xibá zí'alö na' benë' Dios le naché' tu le guzxí' lu në'ë gunë', naca lë na' rnna: "Ben bal xuz xinó'o, ³ ate' gaca dxi'a quiu', ate' xidzé su' ibanu' yödzölió ni."

⁴ Libí'ili', yugu' xuz, bití' gun leli' zxí'inili', pero buli'xón légacabi', en guli'sína' légacabi', en buli'sëdi légacabi' ca raza ládxë'ë Xanru'.

⁵ Libí'ili', núlöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queéli', en gunli' xichíngaquië' ca ral-la' gunli' xichinë' Cristo.

⁶ Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxë'ë Dios, ca na' ral-la' gunli' xichinë' Cristo. ⁷ Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. ⁸ Nöz quézili' ca gunë' Xanru'. Ubi'ë que queéru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

⁹ Libí'ili', nacuá' queéli' bönni' nadó'ogaca, guli'gún dxi'a caní quégaca huen dxin queéli' na', en bití' uzéli' ba nadx légaquië'. Guli'tsöjné ca naca queéli', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' bití' rutsé'ë ca runë' que que bönachi.

Dios runnë' queéru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. ¹¹ Guli'gún chi'i cuinli', ugunli' dxin yugu' le runnë' Dios queéru', le tun chi'i rë'u, para gaca sóali' tsutsu cate' gué'ëni si' bë' tu' xihui' libí'ili'. ¹² Bití' ridíl-lalenru' bönachi néquiguequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la' que dul-la'. ¹³ Que lë ni na':

Guli'sí' yúgu'të le runnë' queéru' Dios le tun chi'i rë'u,
para cate' idxín queéru' dza ni' ilaca le náagaca xihui',
gaca guá' ilenli',
en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútë li,
le gaca queéli' ca tu guídi guga' lé'ëli'.
Guli'gaca tsahui' tu' gun chi'i libí'ili' le naca tsahui'
ca run tu lari' yödx run chi'i luchu'ë bönni' rejë' gudil-la.

¹⁵ Guli'sóa sina' para gunli' libán que didza' dxi'a
le ribequi dxi icja ládxi'do'oru' lahuë' Dios,
ca na' ruzóa cuinë' sina',

en ridé'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queéli' Cristo
gaca queéli' ca tu le naca tsutsu uzëli' loli',
para cabí gál-la' yugu' le usán tu' xihui' libí'ili',
le nácgaca ca yaga túchi'do' zoa guí' láhuilöguequi.

¹⁷ Yöl-la' rusölá gaca queéli' ca tu lu'u guíë le gun chi'i ícjali'.
Xtídzë'ë Dios gaca queéli' ca tu guíë tuchi'
le runnë' Dios Bö' Lá'ayi queëru',
para útil-lalenru' le naca xihui'.

¹⁸ Guli'gún yúgu'të læ ni,
en buli'lídzë' Dios inábili'-në' gácalenë' libí'ili'.
Buli'lídzatica'së' Dios zóalenë' Dios Bö' Lá'ayi libí'ili'.
Para gunli' caní ral-la' usubán ládxi'li' en cabí huóaj ládxi'li',
inábili'-në' Dios gácalenë' nupa néquiguequi queë'.

¹⁹ Buli'lídzë' Dios, inábili'-në' gácalenë' ca' neda', en gunnë' quia'
didza' cate' ral-la' gu'a didza', en gunë' ga gaca' rugu ladxi' cate' guna'
libán para uzéajni'ida' bönachi ca naca le bigachi' que didza' dxi'a.

²⁰ Dios budödë' lu na'a didza' dxi'a na' para guna' libán que, ate' tu'
bena' caní yu'a lidxi guíë ni. Buli'lídzë' Dios channö, inábili'-në' gunë'
ga gaca' rugu ladxi' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹ Tíquico, böchi'ru' na' nadxí'iru'-në', en runë' xichinë' Xanru' idú
ládxe'ë, quíxjöi'inë' libí'ili' idú ca raca quia', en ca runa' neda' ni. ²² Que
læ ni na', isól-la'a-në' queéli', ate' uluí'inë' libí'ili' ca raca queëtu', ate'
caní utipë' ládxi'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi'
icja ládxi'do'oli', en gata' queéli' yöl-la' nadxí'i le dzaga yöl-la' réajlë'
queéli' Cristo, yúgu'tëli' na' néquili' queë'. ²⁴ Le ruzá' ládxe'ë Dios
queëru' gaca queéli', yúgu'tëli' na' nadxí'ili'-në' Xanru' Jesucristo, naca
idú yöl-la' nadxí'i queéli' Lë'. ¡Ca' gaca!